



U ovom broju:

- ➔ **USVOJEN BUDŽET ZA 2023. GODINU**
- ➔ **REALIZACIJA KAPITALNIH PROJEKATA**
- ➔ **I ONI SU BUDUĆNOST TEŠNJA**
- ➔ **POČETAK GRADNJE KORIDORA 5C**
- ➔ **REZIDENTNA PREDSTAVNICA UNDP-a POSJETILA TEŠANJ**
- ➔ **OPĆINA TEŠANJ JE DOBITNIK PLAKETE ZA DOPRINOS U JAČANJU PRINCIPA OTVORENOSTI**
- ➔ **PODRŠKA MLADIMA**



OPĆINA TEŠANJ

Trg Alije Izetbegovića 1

www.opcina-tesanj.ba

e-mail: optesanj@bih.net.ba



JAVNI POZIV ZA MJERU PODRŠKE UBLAŽAVANJA NEGATIVNOG UTICAJA TRŽIŠNIH POREMEĆAJA I KLIMATSKIH PROMJENA U PRIMARNOJ POLJOPRIVREDNOJ PROIZVODNJI

U okviru projekta EU4AGRI, objavljen je Javni poziv za dodjelu bespovratnih sredstava za mjeru podrške ublažavanju negativnog uticaja tržišnih poremećaja i klimatskih promjena u primarnoj poljoprivrednoj proizvodnji.

Interventna mjera podrške će biti realizirana kroz finansijsku podršku za nabavku mineralnih đubriva (NPK, KAN, UREA), finansijsku podršku za nabavku sistema za navodnjavanje, te finansijsku podršku za zaštitu od mraza.

Prihvatljivi podnosioci prijava na ovaj Javni poziv su mikro, mala i srednja preduzećai/ili zadruge sa uspostavljenom mrežom kooperanata/individualnih poljoprivrednih proizvođača koji se bave proizvodnjom i /ili preradom i/ili otkupom i/ ili skladištenjem i /ili plasmanom svježih poljoprivrednih i gotovih prehrambenih proizvoda. Prijave se mogu podnijeti od 15.01.2023. godine, dok je krajnji rok za prijavu 28.02.2023.godine, do 15:00 sati.

Za sve informacije, svi zainteresirani mogu pristupiti Javnom pozivu putem oficijelne web stranice projekta www.eu4agri.ba



Izdaje: **OPĆINA TEŠANJ**

Redakcija:

Edina Kadušić, Samir Brka,
Kanita Gredelj i Bahrudin Nočić.

Glavni i odgovorni urednik:

Edina Kadušić

Adresa Redakcije:

Općina Tešanj, Trg Alije Izetbegovića I
74260 Tešanj

Telefoni: 032 650-341 i 032/650-022 (lokal 107)

Fax: 032/650-220

E-mail: press@opcina-tesanj.ba

Tiraž: 2.000

Štampa: Grafik-komerc Jelah, Tešanj

AŽURIRANJE PODATAKA U REGISTRU POLJOPRIVREDNIH GAZDINSTAVA

Obavještavamo sve poljoprivrednike, pravna i fizička lica, upisana u Registar poljoprivrednih gazdinstava i Registar klijenata, da su u skladu sa zakonskim odredbama obavezni izvršiti ažuriranje podataka za 2023 godinu.

Ažuriranje podataka, odnosno opis promjena se vrši u periodu od 01.01.do 31.03.2023. godine kod općinske službe koja vodi Registar. Ažuriranje su dužni izvršiti i klijenti (udruženja, preduzeća, mjesne zajednice i dr.) koji ostvaruju ostale vrste podrški.

Poljoprivredna gazdinstva koja u navedenom roku ne izvrše ažuriranje podataka neće moći aplicirati za novčane podrške u 2023. godini. Poljoprivrednici koji ostvaruju premije, a žele registrovati obrt ili privredno društvo navedene promjene moraju izvršiti do 31.03.2023.godine.


BUDŽET OPĆINE TEŠANJ ZA 2023. GODINU

Na 21. sjednici Općinskog vijeća Tešanj održanoj 29.12.2022. godine, razmatran je i usvojen Budžet Općine za 2023. godinu.

Usvajanju Budžeta je prethodila izrada Nacrta i provođenje 5 termina usmenog dijela javne rasprave u kojima je učešće uzelo 51 lice, uz dostavu 19 pisanih prijedloga. Rasprava je trajala 30 dana, a evidentirano je ukupno 88 primjedbi i prijedloga, od čega je njih 30 prihvaćeno dijelom ili u cijelosti, a 33 se mogu realizovati kandidovanjem kroz definisana sredstva na postojećim stavkama Budžeta. Nakon toga, Budžet je u odnosu na Nacrt pretrpio izmjene uz uvećanje od 2,5 miliona KM.

Budžet Općine Tešanj za 2023. godinu iznosi 25.131.000 KM i nešto je manji od Budžeta protekle godine. Razlog tome je planirano manje kreditno zaduženje i prijenos sredstava, te neuspostava vlasti i nedonošenje budžeta Federacije BiH i Kantona, zbog čega se u općinskom Budžetu nisu mogla planirati posebna grant sredstva od istih.

Struktura prihodovne i rashodovne strane Budžeta iskazana je u sljedećem grafičkom prikazu:



Općina je prateći inflatorna kretanja povećala izdvajanja za pojedina socijalna izdvajanja, sport, kulturu, održavanje infrastrukture, javnu rasvjetu i drugu komunalnu potrošnju i slično.

Grant sredstva koja se dodjeljuju iz općinskog Budžeta po prvi puta prelaze iznos od 6 miliona KM, a dominiraju grantovi socijalne zaštite i pomoći od 1,75 miliona KM, te grantovi za kulturu, obrazovanje i mlade od 1,23 miliona KM.

Planira se podrška projektima udruženja građana i sportskih klubova sa ukupno 759.000 KM.

Izdvajamo i to da se kroz razne vidove poticaja i podrške privredi u privredne tokove vraćaju sredstva od 755.000 KM.

Povrat sredstava u privredne tokove se čini i kroz realizaciju kapitalnih projekata i grantova koji za 2023. godinu iznose 11,28 miliona KM, što čini blizu 45% općinskog Budžeta.

I dalje se najveća ulaganja planiraju u komunalnoj infrastrukturi sa ukupno 3,52 miliona KM, od čega se na kanalizacionu mrežu odnosi 2,25 miliona KM, a na vodosnabdijevanje (dodatne količine vode i proširenje mreže) 1,27 miliona KM.

Pored projekata koji se kontinuirano realizuju kroz općinski budžet, kao što su ulaganja u mjesnim sredinama (1 miliona KM kroz Plan kapitalnih investicija), gradnja sportskih dvorana (700.000 KM), uređenje industrijskih zona (320.000 KM), opremanje civilne zaštite (842.000) gradnja objekta osnovne škole Medakovo (300.000 KM), eksproprijacije (400.000 KM) i drugo, planirani su i novi projekti.

Izdvajamo, podršku projektima energetske efikasnosti od 150.000 KM, te digitalnu transformaciju lokalne zajednice koja će se realizovati kroz budžetske stavke do 175.000 KM.

Ovaj Budžet je razvojni, budući da kapitalni dio, zajedno sa grantovima koji se dodjeljuju direktno kao poticaj privredi, čini blizu 48% Budžeta.

REZIDENTNA PREDSTAVNICA UNDP-a U BiH POSJETILA TEŠANJ

Rezidentna predstavnica UNDP-a u Bosni i Hercegovini Steliana Nedera sa saradnicima boravila je u radnoj posjeti Tešnju i ovom prilikom se srela sa Općinskim načelnikom Suadom Huskićem. Tokom sastanka u Općini Tešanj, razgovarano je o projektima koji su realizovani u partnerstvu sa UNDP-om, kao i o planiranim projektima u narednom periodu.

Drago mi je da je Rezidentna predstavnica UNDP-a posjetila Tešanj kako bismo razgovarali o svim dosadašnjim projektima koje je UNDP uz brojne donatore realizovao na području općine Tešanj. Kroz projekat MEG I realizovani su projekti u vrijednosti preko 1 milion maraka. Osim toga, projekti Jačanje uloge mjesnih zajednica u BiH I i II faza su uspješno implementirani, kao i drugi projekti, kao što su EU4Agri, Žene na izborima, itd. Ovom prilikom smo razgovarali i o nastavku započetih projekata, kao i o projektima koje ćemo raditi u narednim godinama, rekao je Općinski načelnik Suad Huskić.



Općina Tešanj je veoma uspješna kada je u pitanju realizacija projekata koje smo zajednički radili u prethodnim godinama. Kada je u pitanju MEG projekat, vi u Tešnju ste postigli odlične rezultate i inspiracija ste drugim lokalnim sredinama. UNDP je za naredni period odredio prioritete kada je u pitanju realizacija projekata u oblastima, prije svega energetske efikasnosti, podršci ekonomskom razvoju, kao i digitalnoj transformaciji, te se nadamo da ćemo ostvariti uspješnu saradnju i u narednim godinama, istakla je Rezidentna predstavnica UNDP-a u Bosni i Hercegovini Steliana Nedera.

Nakon sastanka u Općini Tešanj, delegacija je u društvu Općinskog načelnika posjetila dio projekata koji su realizovani u Tešnju, firmu Madi koja je kroz projekat EU4Agri implementirala solarni energetske sistem, zatim inkluzivno dječije igralište ispred OŠ Rešad Kadić na Krndiji. Na kraju, delegacija je posjetila i OŠ I. mart Jelah gdje je putem Federalnog ministarstva realizovan projekat Energetske efikasnosti.

NASTAVAK SARADNJE OPĆINE TEŠANJ I MOZAIK FONDACIJE

U Općini Tešanj je održana promocija rezultata Omladinske banke Tešanj za 2022. godinu, a potpisan je i Memorandum o saradnji Općine Tešanj i Fondacije Mozaik za period 2023-2026. godina. Memorandumom su predviđena finansijska sredstva za grantove neformalnih grupa i mikrobiznise u iznosu od 33.000 KM na godišnjem nivou.

Ponosni smo na 15 godina partnerstva Općine Tešanj i Fondacije Mozaik na razvoju i podršci

Omladinske banke Tešanj u periodu 2008-2021. godine gdje je podržano 4 mikrobiznisa vrijednosti 7.744 KM i 143 projekta ukupne vrijednosti 488.665 KM, a koje su realizovali 2.085 mladih osoba volontirajući i radeći 33.047 sati. Tokom 2022. godine odobrena su 3 mikrobiznisa i 16 projekata.



ISPUNJENI USLOVI ZA POČETAK GRADNJE KORIDORA 5C U TEŠANJU

Općinski načelnik Suad Huskić početkom decembra predao je dokumentaciju izvršnom direktoru za projektovanje i građenje JP Autoceste FBiH Ešefu Džafiću, čime su ispunjeni svi uslovi za početak gradnje dionice Koridora 5c kroz općinu Tešanj, od Putnikovog brda do Medakova. Radi se o dionici dugoj 8,5 km, sa 7 mostova i 2 petlje, ukupne vrijednosti 143 miliona eura.

U Općini Tešanj smo u posljednje 2,5 godine radili na eksproprijaciji 600 parcela, tako da je za nas, danas kada predajemo završnu dokumentaciju predstavnicima JP Autoceste FBiH, ovo svečani trenutak. Želim se zahvaliti građanima i mjesnim zajednicama koji su sudjelovali u ovom procesu, a posebno mojim saradnicima koji su direktno radili na ovom poslu. Završetkom Koridora, općina Tešanj će biti bliža mreži evropskih puteva, a to znači novu fazu razvoja za Tešanj u narednim decenijama, rekao je Općinski načelnik Suad Huskić.

Izvršni direktor za projektovanje i građenje JP Autoceste FBiH Ešef Džafić je naglasio da je obezbijedena građevinska dozvola, te potpisani ugovori sa izvođačem i nadzorom. Zahvalio se općini Tešanj, Načelniku i saradnicima na uspješnoj saradnji.



U narednim danima počinju pripremni radovi za gradnju Koridora 5c kroz općinu Tešanj. Svi radovi bi na dionici Putnikovo Brdo-Medakovo prema ugovorenim rokovima trebali biti završeni do kraja 2025. godine. Gradilište se već organizira, a prvi radovi će podrazumijevati postavljanje šipova na lokacijama gdje se grade nadzemni objekti. Na današnjem sastanku, osim predstavnika Općine Tešanj i JP Autoceste FBiH, prisustvovali su i predstavnici izvođača, firme *Euroasfalt* i nadzora.

OPĆINA TEŠANJ DOBITNIK PLAKETE ZA DOPRINOS U JAČANJU PRINCIPA OTVORENOSTI U 2021/2022. GODINI

Općina Tešanj je dobitnik plakete za doprinos u jačanju principa otvorenosti u 2021/2022. godini i nalazi se na drugom mjestu od ukupno 145 općina i gradova u BiH gdje je istraživanje provedeno. Plaketa je predstavniku općine Tešanj uručena u Sarajevu gdje je Udruženje građana i građanki *Zašto ne* organizovalo događaj pod nazivom *Lokalne samouprave u BiH – odgovornost i otvorenost u radu*.

Na ovom događaju su prezentovani rezultati monitoringa ispunjenosti predizbornih obećanja načelnika i gradonačelnika u 15 jedinica lokalne samouprave u BiH nakon druge godine mandata, od 2020. do 2024. godine.

Također, prezentovani su i rezultati istraživanja otvorenosti 145 općina i gradova u BiH u 2022. godini, koje je provedeno u okviru projekta *Lokalni indeks otvorenosti* i ovom prilikom su dodijeljene plakete najotvorenijim općinama i gradovima u BiH prema rezultatima *Lokalnog indeksa otvorenosti*. Općina Tešanj je dobitnik plakete, budući da je ostvarila rezultat od 77,42% i nalazi se u prvih pet općina i gradova u BiH tokom 2022. godine kada su u pitanju otvorenost i proaktivna transparentnost.



REALIZACIJA LISTE KAPITALNIH PROJEKATA U 2022. GODINI

U skladu sa Odlukom o usvajanju Plana kapitalnih investicija za 2022. godinu iz sredstava budžeta Općine Tešanj za 2022. godinu realizovani su projekti u mjesnim zajednicama, kao i projekti općeg značaja. Osim toga, realizovani su i projekti iz drugih sredstava (sredstva budžeta, vodne naknade, učešće građana, podrška projektima iz drugih izvora i utrošak sredstava od koncesija). U realizaciju ovih projekata utrošeno je cca.3 miliona maraka.

MJESNE ZAJEDNICE

Bobare-Drinčići-Blaževci – Asfaltiranje puta Usora – 20.389,59 KM
Put Križ-Blaževci – 60.887,15 KM

Bukva – Sokak Dedići – 19.586,57 KM
Asfaltiranje puta Šaranovići krak – 22.806,73 KM

Dobropolje-Mekiš – Put Mekiš – Čaglići – 80.462,36 KM

Džemilić Planje – Asfaltiranje puta Žile – Spreče – 26.511,62 KM

Jablanica – Asfaltiranje puta Čaglići – Roše – 80.462,36 KM

Jelah – Asfaltiranje puta u Potočanima – 29.679,16 KM
Asfaltiranje puta Cerovac – 79.836,99 KM

Kalošević – Asfaltiranje puta Bošnjaci i Stara cesta – 21.517,57 KM

Karadaglije – Asfaltiranje puta Gromulja Pilićara – 33.588,07 KM

Kraševo – Asfaltiranje puta Dubravci – 14.814,67 KM
Asfaltiranje puta Ogrići Bazen – 12.028,96 KM

Ljetinić- Asfaltiranje puta ispred Društvenog doma - 20.696,83 KM

Medakovo – Izgradnja trotoara Dom-Grič – 22.413,62 KM



Miljanovci-Lončari – Put Bare-Škola-Omerbašići (presvlaka) – 17.822,79 KM

Novi Miljanovci – Trotoari – 17.339,07 KM

Mrkotić - Asfaltiranje puta Kukuljevac – 29.007,11 KM

Novo Selo – Put Dom Bedaci Park – 19.027,75 KM

Orašje Planje – Poslovni objekat za potrebe MZ – 19.626,75 KM

Piljužići - Asfaltiranje puta Zovke – 28.254,11 KM

Rosulje – Adaptacija zgrade MZ – 10.541,70 KM
Asfaltiranje puta Agići – Bajina glava – 8.000,00 KM

Šije - Asfaltiranje puta Adžići – Grič - džamija - 21.081,47 KM

Tešanj – Put Prnjavorci-Kruške – 31.378,87 KM
Put Sejmenpolje – Kašibovića voda – 36.387,00 KM
Put Mekteb – Ravne – 30.217,60 KM

Tešanjka – Put Djedovići – 43.437,30 KM

Trepče – Asfaltiranje puta Bare – Zlatići – 31.019,85 KM

Vukovo - Asfaltiranje puta Stara cesta – Agići – 32.305,00 KM

PROJEKTI OPĆEG INTERESA

OŠ 9. septembar Medakovo, II faza – 491.400,00 KM

OŠ 9. septembar Medakovo, III faza – 440.000,00 KM

Raskrsnica Tešanj – Jelah (OŠ Rešad Kadić Krndija, Cerovac) – 160.000,00 KM

Uređenje poslovne zone Bukva – 187.632,18 KM

KONCESIJE I DODATNA SREDSTVA

Put Planje-Jevadžije, MZ Orašje Planje – 29.284,96 KM

Put Grab, MZ Trepče – 23.089,91 KM

PROJEKTI KOJI SU REALIZOVANI U 2022. GODINI (PRENESENA SREDSTVA)

Probno-eksploatacioni bunar PEB 3 – 347.857,00 KM

Sportska dvorana Jelah – 260.910,00 KM

Vodovod Mekiš – 210.284,79 KM



I ONI SU BUDUĆNOST TEŠNJA

Općina Tešanj je pokrenula projekat predstavljanja mladih uspješnih ljudi sa ciljem promoviranja kako njihovih profesionalnih i životnih postignuća tako i univerzalnih društvenih vrijednosti.

Kao prvo, želimo dati prostor i predstaviti mlade uspješne ljude sa ciljem promoviranja istinskih društvenih vrijednosti kao što su znanje, uspjeh, rad i zalaganje, te odgoj i društvena empatija. Smatramo da svaki mladi muškarac i svaka mlada žena imaju šansu da budu uspješni u Tešnju. Želimo pokazati da naš Tešanj kao lokalna zajednica ima svijetlu ili prosperitetnu budućnost. Na ovaj način predstaviti ćemo naš Tešanj u kojem itekako ima mjesta i za mlade i uspješne ljude koji grade jedno društvo u kojem uspjeh nije nikakvo 'čudo', već pravilo i normalna stvar do koje se dolazi znanjem i zalaganjem, riječi su Suada Huskića, Načelnika općine Tešanj.

Znanje, nauka, društvena empatija, porodica, pa i lokalpatriotizam, marljivost, su neke od naših prednosti, i upravo su to vrijednosti koje krase Tešanj.

Kroz mnogobrojne primjere uspješnih mladih ljudi, pokazat ćemo da odlazak iz Tešnja i Bosne i Hercegovine nije opcija koja treba biti jedino rješenje za mlade ljude, te da u Tešnju itekako ima mjesta i budućnosti za sve.

Namjera je da u periodu koji je pred nama predstavimo mlade osobe ili grupu njih iz različitih oblasti kao što su industrija i privreda, poljoprivreda, medicina, obrazovanje, nauka, umjetnost, sport, društveni angažman/altruizam, zanatstvo, itd. Zanimat će nas postignuće i posvećenost u određenoj oblasti, ali i jasan životni cilj, moralne i etičke vrijednosti, porodica i djeca, prijatelji, zajednica, kao i stavovi o bitnim društvenim okolnostima.



MHM ROBOTICS

Firma koju su tri mladića iz Tešnja, Muhamed, Harun i Medin pokrenuli 15. augusta 2022. godine, a već u septembru su proizveli svoju prvu prototip mašinu kako bi se predstavili na Sajmu privrede Tešanj 2022. U međuvremenu su prodali dvije CNC mašine na domaćem tržištu, dok treću završavaju za poznatog kupca u Tešnju. Mašine su unikatne, i rađene namjenski od projektovanja pa do hardvera i softvera. Radi se o najsavremenijim tehnologijama koje uključuju automatizaciju, robotizaciju i digitalizaciju. Njihovim mašinama moguće je upravljati na daljinu, a rješavaju komplicirane probleme u proizvodnji. Za sada su fokusirani na drvenu, metalnu i tekstilnu industriju. Cijena njihovih mašina se kreće od 30.000 KM do 200.000 KM i više. Na cijenu utiče sama složenost procesa koje ovi pametni strojevi izvode. Svaku mašinu nude u tri različita cjenovna razreda, ovisno o kvaliteti komponenti koje se koriste. Već sada su ozbiljni konkurenti turskim i kineskim proizvođačima.



NADINA MEHMEDOVIĆ TAEKWONDO PRVAKINJA BIH

Tri godine članica je Nacionalnog kadetskog tima i isto toliko juniorske Reprezentacije Bosne i Hercegovine. Proglašavana je sportskom nadom, te najuspješnijom juniorkom Općine Tešanj i Zeničko-dobojskog kantona u konkurenciji svih sportova tri godine za redom. U 2021. godini proglašena je najuspješnijom juniorkom Bosne i Hercegovine u konkurenciji svih sportova, a ušla je i među dvije najuspješnije sportistkinje Olimpijskog komiteta BiH. Prošlu godinu završila je na drugom mjestu Svjetske juniorske rang liste najboljih takmičarki Svijeta u taekwondou. Početkom 2022. godine Nadina Mehmedović nastupa u seniorskim kategorijama, i tako priprema bodove na seniorskoj Svjetskoj rang listi, kao i za Olimpijsku normu tj. kvalifikacije za Olimpijske igre u Parizu 2024 godine.



BRAĆA I DOKTORI – AJDIN I SEMIR IBRAHIMOVIĆ

Ajdin i Semir Ibrahimović su rođena braća. Obojica su doktori, tj. obojica su završili Medicinski fakultet na Univerzitetu u Tuzli. Stariji Ajdin zaposlen je u JU Opća Bolnica Tešanj. Mlađi Semir radi u JZU Domu zdravlja Tešanj. Ajdin je doktor – specijalizant. Semir je oženjen. Ovih dana mediji nas zatrpavaju vijestima o mladima koji napuštaju Bosnu i Hercegovinu. Ajdin i Semir ne razmišljaju o odlasku. Najprije zbog podrške roditelja i sredine iz koje su potekli, a onda kako kaže Ajdin barem mi koji se bavimo ovim poslom nemamo razloga da idemo. Zadovoljni smo našim radnim mjestima, zadovoljni smo mogućnošću napredovanja. Pošto u Bolnici imamo i tercijarni nivo zdravstvene zaštite, teško da bilo gdje mogu ostvariti bolje uslove nego u Tešnju. Ni Semir nema nikakvu ambiciju da odlazi iz Tešnja a kamo li iz države i kako kaže za nafaku se moramo sami izboriti.

PODRŠKA MLADIMA ZA KUPOVINU ILI GRADNJU VLASTITE NEKRETNINE

Mladi općine Tešanj imaju priliku koristiti mehanizam podrške Općine Tešanj i BBI banke za rješavanje stambenog pitanja. Rezultat je ovo potpisanog Ugovora o poslovnoj saradnji između BBI banke i Općine Tešanj. BBI banka je za ovu svrhu osigurala 1,3 miliona KM, dok je Općina u svom budžetu za ovu godinu izdvojila 100 hiljada KM za subvencioniranje profitne marže.

Općina Tešanj je odlučila da pored svih dosadašnjih oblika podrške, pokrene i Program podrške mladima za rješavanje stambenih potreba. Mladima ćemo pružiti novu priliku za kupovinu ili gradnju vlastite nekretnine. Nadamo se da ćemo im biti podrška da što prije žive u svom vlastitom domu. Tokom decembra će biti objavljen javni poziv sa svim detaljima, izjavio je Općinski načelnik Suad Huskić.

Za povoljno finansiranje po javnom pozivu moći će aplicirati građani starosti do 35 godina, koji ispunjavaju uslove koje utvrđuje Banka, a koji, po prvi put rješavaju vlastito stambeno pitanje.

Društveno odgovorno poslovanje jedan je od temeljnih principa na kojima poslujemo i stoga su naše aktivnosti usmjerene na pomoć privredi i građanima BiH. Raduje nas inicijativa Općine Tešanj koja će mladim ljudima olakšati stambeno zbrinjavanje. Mi u BBI banci spremni smo odgovoriti zahtjevima mladih ljudi i pomoći im da izgrade svoj dom ovdje u Tešnju, po povoljnim uslovima finansiranja, izjavio je Edin Buljina direktor Segmenta Retail prodaja BBI banke.

Ugovorom je predviđeno da će jedan aplikant moći dobiti finansiranje do 50 hiljada KM. Rok otplate je do 20 godina, a profitna marža kretat će se od 3 do 3,55 posto u zavisnosti od roka otplate. Općina će, nakon provjere ispunjenja uslova subvencioniranja, isplaćivati profitnu maržu u iznosu do 3 posto, što u konačnici znači da će se građani koristiti finansiranjima već od 0%. Svi zainteresovani detaljnije informacije mogu dobiti u BBI banci u Tešnju.



PČELARSKA OPREMA I MATERIJAL ZA DVADESET KORISNIKA SA PODRUČJA OPĆINE TEŠANJ

Predstavnici Udruženja za razvoj i afirmaciju društva u BiH – NODAS u saradnji sa Općinom Tešanj organizovali su potpisivanje ugovora o dodjeli pčelarske opreme i materijala za dvadeset korisnika sa područja općine Tešanj. Radi se o realizaciji dijela projekta *Zaštitimo pčele, spasimo ekosistem* rezervisanog za direktan rad sa korisnicima, tj. pčelarima. Za ovaj dio projekta predviđena je finansijska podrška u iznosu od 60.000 Eura.

Projekat *Zaštitimo pčele, spasimo ekosistem* zajedno realizuju Udruženje za razvoj i afirmaciju društva u BiH – NODAS, Općina Tešanj, Udruženje pčelara *Pčela* Tešanj i sami korisnici. Uskoro se očekuje podjela dijela opreme i materijala pčelarima. Za učešće u projektu su se mogli prijaviti svi oni koji se bave pčelarstvom bez obzira da li su članovi Udruženja ili su se ranije bavili pčelarstvom.

Jedan od ciljeva Projekta jeste poboljšanje situacije u sektoru pčelarstva na području općine Tešanj, ali i prijeko potrebna pomoć mladim pčelarima da započnu i/ili održe proizvodnju meda i drugih pčelinjih proizvoda. Pored direktne podrške za korisnike, tu je i podrška Udruženju koje je direktni korisnik granta od 12.000 Eura. Ova sredstva će biti usmjerena na povećanje kapaciteta Udruženja, prije svega na proizvodnju neophodnih proizvoda svojim članovima (proizvodnja pčelinjih pogača).

NODAS je od 1. 12. 2021. godine pristupio implementaciji projekta *Zaštitimo pčele, spasimo ekosistem*, kojim je predviđena dodjela materijalnih donacija za ukupno 80 pčelara (koliko ih je projektom obuhvaćeno) i 4 udruženja pčelara iz 4 opštine/općine/grada (Tešanj, Ljubinje, Milići i Livno) u BiH. Projekat finansira njemačko Savezno ministarstvo za ekonomsku saradnju i razvoj (BMZ) kao glavni donator, a implementirat će ga NODAS uz superviziju njemačke nevladine organizacije *Help Hilfe zur Selbsthilfe* e.V. u periodu od 1. 12. 2021 do 31. 5. 2023. godine



ZAVRŠEN 8. TURNIR MJESNIH ZAJEDNICA OPĆINE TEŠANJ

U Sportskoj dvorani u Tešnju, u nedjelju, 8. januara 2023. godine održana je završnica 8. turnira mjesnih zajednica općine Tešanj u malom nogometu, streljaštvu i stonom tenisu. Organizator turnira je Sportsko-rekreacioni centar Tešanj uz podršku Općine Tešanj.

Osvajač turnira u malom nogometu je ekipa Šije I, a konačan poredak je bio:

1. mjesto ekipa MZ ŠIJE I
2. mjesto ekipa MZ PILJUŽIĆI I
3. mjesto ekipa MZ ŠIJE 2

Dodijeljena su i pojedinačna priznanja najboljem igraču i najboljem golmanu turnira.

U ekipnoj konkurenciji u streljaštvu, rezultati su sljedeći:

1. mjesto MZ KARADAGLIJE
2. mjesto MZ NOVI MILJANOVCI
3. mjesto MZ TEŠANJ

U pojedinačnoj konkurenciji u streljaštvu rezultati su sljedeći:

1. mjesto Asima Halilović
2. mjesto Adem Klepić
3. mjesto Hana Subašić

U ekipnoj konkurenciji za takmičenje u stonom tenisu poredak je sljedeći:

1. mjesto MZ MRKOTIĆ
2. mjesto MZ KRAŠEVO
3. mjesto MZ JELAH

Pobjednici turnira u pojedinačnom takmičenju u stonom tenisu su:

1. mjesto Besim Sejdić
2. mjesto Aidin Dubravac
3. mjesto Almir Dubravac

Najmlađoj takmičarki Dženani Mervanović je pripala nagrada za fair play.

Po završetku turnira uručene su zahvalnice organizatorima i koordinatorima turnira, a to su:

- Besim Sejdić – koordinator za stoni tenis
- Sakib Plančić – koordinator za streljaštvo
- Emin Beganović – delegat za mali nogomet


Svim učesnicima se zahvaljujemo na učešću, a najboljima upućujemo iskrene čestitke. Hvala i mnogobrojnoj publici koja je dolazila da prati utakmice, a turnir će biti organizovan i sljedeće godine uz podršku Općine Tešanj.



KLIMATOLOŠKI PODACI ZA 2022. godinu

	Januar	Februar	Mart	April	Maj	Jun	Jul	Avgust	Septembar	Oktoabar	Novembar	Decembar
Prosječna temp. (°C)	1,73	5,30	5,60	10,34	17,57	21,97	22,48	21,40	16,45	14,19	8,07	5,41
Padavine (mm)	33,7	57,5	14,5	76,00	68,5	154,5	97,0	122,1	155,5	15,0	138,6	93,0

Najniža dnevna temp. u 2022. godini izmjerena je:	-10 °C	(25.01.2022.)
Najviša dnevna temp. u 2022. godini izmjerena je:	39 °C	(23.07.2022.)
Prosječna temperatura zraka za 2022. godinu izmjerena je:	12,54 °C	
Ukupna količina padavina za 2022. godinu izmjerena je:	1025,9 mm	
Danas sa najviše snježnice u 2022. godini:	50 cm	(13.03.2022.)
Mjesec sa najviše padavina u 2022. godini:	155,5 mm	(septembar)
Mjesec sa najmanje padavina u 2022. godini:	14,5 mm	(Mart)
Prosječna mjesečna količina padavina u 2022. godini:	85,49 mm	
Broj pretežno vjetrovitih dana u 2022. godi:	106	
Broj pretežno oblačnih i oblačnih dana u 2022. godi:	152	
Broj kišnih dana u 2022. godini:	105	
Broj dana sa sušnim padavinama u 2022. godini:	2	



PREVENTIVNE MJERE ZAŠTITE I SPAŠAVANJA

Sanacija klizišta i odrona na području općine Tešanj, kao i provođenje preventivnih mjera zaštite od poplava realizovano je u cilju sprječavanju širenja postojećih i nastanka novih klizišta i u skladu sa nastalim posljedicama usljed poplava. Aktivnosti su vođene u mjesnim zajednicama Tešanjka, Miljanovci Lončari, Tešanj, Bukva, Piljužići, Raduša, Novo Selo, Kalošević, Jablanica, Karadaglije, Dobropolje-Mekiš, Trepče, Šije, Jelah i Mrkotić. Provođenje mjera se odnosilo na čišćenje, produbljivanje i uređenje vodotoka, te izgradnju obaloutvrda i sanaciju klizišta na mjestima koja predstavljaju prijetnju dalje erozije obala i zemljišta.

Za realizaciju navedenih aktivnosti u 2022. godini kroz preventivne mjere do sada je utrošeno 50.000 KM.



MONITORING KONCETRACIJA POLENA

U cilju uspostave monitoringa koncentracija alergogenog polena i spora, Općina Tešanj je nabavila i na zgradi JU Biblioteka Tešanj instalirala savremenu polen stanicu čiji će uzorkivač tokom vegetativnog perioda vršiti apsorpciju polenovih zrna različitih vrsta biljaka. Osnovni cilj monitoringa je procjena kvalitativno-kvantitativnog sastava polena alergogenih vrsta biljaka tokom vegetacijske sezone na području općine Tešanj. Praćenjem polinacije bit će omogućena identifikacija pojava o vrstama i koncentraciji polena, što će omogućiti redovno informisanje i davanje preporuka i savjeta na štetne posljedice koje uzrokuju alergeni.

Praćenje polinacije i tehničko opsluživanje polen stanice će vršiti Institut za zdravlje i sigurnost hrane Zenica. Očitani podaci o vrstama i koncentraciji alergena će kroz redovnu razmjenu biti dostupni Općini Tešanj



UPOZORENJE NA NEEKSPLODIRANA UBOJNA SREDSTVA

Svjedoci smo učestalim pojavama pronalaska zaostalih neeksplodiranih ubojnih sredstava (NUS) na cijelom području općine Tešanj. Obzirom da se radi o aktivnosti koja je aktuelna tokom svih postratnih godina, a i sada, za očekivati je da se navedene aktivnosti nastave i narednih godina, uzimajući u obzir da je ista definisana i kao mjera u zaštiti i spašavanju ljudi i materijalnih dobara, te se kao takva može okarakterisati kao mjera trajnog karaktera. Ono što može da nosi negativne posljedice u provođenju ove mjere jeste neadekvatan i neodgovoran odnos kod pronalaska NUS-a. Krajnje neodgovorno je diranje i premještanje pronađenog NUS-a, posebno u blizini linija razgraničenja, zbog mogućeg ulaska u minsko sumnjivu površinu.



Zbog toga, i ovom prilikom upozoravamo stanovništvo na dosljedno provođenje mjera pri pronalasku NUS-a, koje se odnosi da se isti ne dira, premješta, da mu se ne prilazi zbog mogućeg ulaska u minsko sumnjivu površinu, a sve u cilju smanjenja mogućnosti da dođe do stradanja ljudi.

Ukoliko je NUS uočen, potrebno je odmah obavijestiti Operativni centar civilne zaštite na broj telefona 121 (032/650-439) ili Policijsku stanicu Tešanj na broj telefona 122.



OPĆINA TEŠANJ

- 📍 Trg Alije Izetbegovića 1
74260 TEŠANJ, BiH
- ☎️ +387 (0)32 650 022
- 📠 +387 (0)32 650 220
- ✉️ optesanj@bih.net.ba
- 🌐 www.opcina-tesanj.ba



2023

